



საქართველოს მთავრობის გ ა ნ კ ა რ გ უ ლ ე ბ ა

N 1098 2024 წლის 1 აგვისტო ქ. თბილისი

„2024 წლის რთვლის ორგანიზებულად ჩატარებისათვის
განსახორციელებელი ღონისძიებების შესახებ“ საქართველოს მთავრობის
2024 წლის 14 ივნისის №873 განკარგულებაში ცვლილების
შეტანის თაობაზე

საქართველოს ზოგადი ადმინისტრაციული კოდექსის 63-ე მუხლის
შესაბამისად, „2024 წლის რთვლის ორგანიზებულად ჩატარებისათვის
განსახორციელებელი ღონისძიებების შესახებ“ საქართველოს მთავრობის
2024 წლის 14 ივნისის №873 განკარგულებაში შეტანილ იქნეს ცვლილება და:

ა) განკარგულების მე-6 პუნქტი ჩამოყალიბდეს შემდეგი რედაქციით:

„6. ა(ა)იპ – სოფლის განვითარების სააგენტომ უზრუნველყოს მის
მმართველობაში არსებული შპს „მოსავლის მართვის კომპანიის“ (ს/ნ:
405406109) მიერ 2024 წლის რთვლის პერიოდში ჭარბი/დაზიანებული
ყურძნის, მათ შორის, კახეთის რეგიონში მოწეული რქაწითლის არანაკლებ
1,00 ლარად მიღება-გადამუშავებისათვის აუცილებელი ღონისძიებების
გატარება და, საჭიროების შემთხვევაში, შესაბამისი საკრედიტო რესურსების
მომიება საფინანსო ინსტიტუტებიდან.“;

ბ) განკარგულების მე-6 პუნქტის შემდეგ დაემატოს შემდეგი შინაარსის მე-7 – მე-18 პუნქტები:

„7. „საქართველოს 2024 წლის სახელმწიფო ბიუჯეტის შესახებ“ საქართველოს კანონით გათვალისწინებული მევენახეობა-მელვინეობის განვითარების პროგრამის (პროგრამული კოდი: 31 03) „რთველის ხელშეწყობის ღონისძიებების“ ქვეპროგრამით (პროგრამული კოდი – 31 03 05) გამოყოფილ ასიგნებათა ფარგლებში, სააგენტომ მევენახეობის სფეროში დასაქმებული ფიზიკური პირების მიერ მიღებული ყურძნის მოსავლის რეალიზაციის ხელშეწყობის მიზნით, უზრუნველყოს ყურძნის ჩამზარებელი ფიზიკური პირებისგან (შემდგომში – ყურძნის ჩამზარებელი) კახეთის რეგიონში მოწეული 1 კგ რქაწითლის ჯიშის ყურძნის შესყიდვის სანაცვლოდ ღვინის კომპანიებზე, გარდა სახელმწიფო საკუთრებაში არსებული კომპანიისა, სუბსიდიის გაცემა 0,20 ლარის ოდენობით;

8. საქართველოში მოწეული ყურძნის ჩამზარება/მიღება რთველის მიმდინარეობისას განხორციელდეს სააგენტოს მევენახეობის კადასტრის ბაზის შესაბამისად.

9. ეთხოვოთ მევენახეობის ზონებში არსებულ მუნიციპალიტეტებს, საჭიროების შემთხვევაში უზრუნველყონ სააგენტოს მიერ შემუშავებული ფორმის შესაბამისად ყურძნის ჩამზარებლებზე ყურძნის წარმოშობის შესახებ ცნობების გაცემა.

10. რთველის მიმდინარეობისას, ყურძნის ჩამზარება/მიღება შპს „მოსავლის მართვის კომპანიაში“ (ს/ნ: 405406109), საჭიროების შემთხვევაში, განხორციელდეს შესაბამისი მუნიციპალიტეტის მიერ ყურძნის ჩამზარებლებზე გაცემული ყურძნის წარმოშობის შესახებ ცნობის შესაბამისად.

11. ამ განკარგულების მე-7 პუნქტში მითითებული სუბსიდიის მიღების უფლება აქვს მხოლოდ იმ ღვინის კომპანიას, რომელსაც დაცული აქვს ამავე განკარგულების მე-4 პუნქტით გათვალისწინებული პირობები და რომელიც:

ა) ყურძნის მიღება-გადამუშავების პროცესის დაწყებამდე სააგენტოსთან გააფორმებს ხელშეკრულებას (შემდგომში – ხელშეკრულება);

ბ) 2024 წლის რთვლის განმავლობაში შეისყიდის და გადაამუშავებს კახეთის რეგიონში მოწეულ არანაკლებ 100 (ასი) ტონა რქაწითლის ჯიშის ყურძენს;

გ) შესყიდული 1 კგ რქაწითლის ჯიშის ყურძნის სანაცვლოდ ყურძნის ჩამზარებელს გადაუხდის არანაკლებ 1,00 ლარს;

დ) 2024 წლის 1 დეკემბრამდე სააგენტოს წარუდგენს:

დ.ა) ყურძნის ჩამზარების თაობაზე ყურძნის ჩამზარებელსა და ღვინის კომპანიას შორის გაფორმებულ მიღება-ჩამზარების აქტს, რომელსაც ხელს აწერენ საქართველოს გარემოს დაცვისა და სოფლის მეურნეობის სამინისტროს/სააგენტოს, ღვინის კომპანიის უფლებამოსილი წარმომადგენლები და ყურძნის ჩამზარებელი;

დ.ბ) ყურძნის ჩამზარებლისთვის რქაწითლის ჯიშის 1 კგ ყურძნის შესყიდვის სანაცვლოდ არანაკლებ 1,00 ლარის გადახდის დამადასტურებელ დოკუმენტაციას.

12. იმ შემთხვევაში, თუ ღვინის კომპანიას არ აქვს დასრულებული ყურძნის მიღების პროცესი და სააგენტოსათვის წარდგენილ განზრახვაში დაფიქსირებული აქვს არანაკლებ 100 (ასი) ტონა ყურძნის – რქაწითლის მიღების შესახებ ინფორმაცია, მას უფლება აქვს, მიიღოს სუბსიდიის თანხა, რისთვისაც ღვინის კომპანია ვალდებულია, 2024 წლის რთვლის მიმდინარეობის პროცესში წარადგინოს „საქართველოს ეროვნული ბანკის შესახებ“ საქართველოს ორგანული კანონის შესაბამისად კომერციული ბანკის მიერ სააგენტოს სასარგებლოდ გაცემული საბანკო გარანტია (ბენეფიციარი – სააგენტო), რომლის ოდენობაც 10%-ით უნდა აღემატებოდეს ღვინის კომპანიის მიერ მისაღები სუბსიდიის თანხას.

13. ღვინის კომპანიაზე ამ განკარგულების მე-7 პუნქტში მითითებული სუბსიდია გაიცემა ამ განკარგულების მე-11-მე-12 პუნქტებით გათვალისწინებული დოკუმენტაციის სააგენტოში წარდგენიდან 15 სამუშაო დღის ვადაში.

14. ღვინის კომპანიის მიერ ამ განკარგულებისა და ხელშეკრულებით გათვალისწინებული პირობების შეუსრულებლობის შემთხვევაში, ღვინის კომპანიის მიმართ მოთხოვნის უზრუნველყოფის მიზნით სააგენტოს სასარგებლოდ გაცემული საბანკო გარანტიის თანხა სრულად მიემართება სახელმწიფო ბიუჯეტში.

15. ღვინის კომპანიების მიერ ყველა კატეგორიის ღვინის წარმოება დასაშვებია მხოლოდ რთვლის საკოორდინაციო შტაბის მიერ აღრიცხული ყურძნისაგან.

16. დაცული ადგილწარმოშობის დასახელების ღვინოების დასამზადებლად განკუთვნილი ყურძნის ჯიშის მოსავლიანობა 1 ჰა ვენახიდან განისაზღვროს ამ ღვინისათვის დადგენილი წარმოების სპეციფიკაციის მაჩვენებლის შესაბამისად.

17. ღვინის კომპანია ვალდებულია:

- ა) უზრუნველყოს ყურძნის ყოველდღიური მიღების განზრახვის შესახებ ინფორმაციის მიწოდება რთვლის საკოორდინაციო შტაბისათვის;
- ბ) მოახდინოს ყურძნის გადამუშავების შედეგად დარჩენილი ჭაჭის გამოხდა ან მისი სხვა სახით გამოყენება/განადგურება და არ დაუშვას ჭაჭის ფიზიკური პირებისთვის გადაცემა.

18. ეთხოვოთ თვითმმართველი ქალაქების აღმასრულებელ ორგანოებს 2024 წლის რთვლის პერიოდში ყურძნის რეალიზაციის ხელშეწყობის მიზნით შესაბამისი ადგილების გამოყოფა.“.

პრემიერ-მინისტრი



ირაკლი კობახიძე